

SOALAN NO. 19

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

DARIPADA : DATO' NORAINI BINTI AHMAD [PARIT SULONG]

TARIKH : 19 JUN 2014 (KHAMIS)

SOALAN :

Dato' Noraini binti Ahmad [Parit Sulong] minta MENTERI PEMBANGUNAN WANITA, KELUARGA DAN MASYARAKAT menyatakan apakah mekanisme yang digunakan oleh Kementerian dalam menentukan jumlah bantuan yang diberi kepada setiap golongan sasaran di bawah tanggungjawab Jabatan Kebajikan Masyarakat dan berapa kerapkah jumlah bantuan bagi setiap golongan sasaran ini dibuat kajian semula.

JAWAPAN:

Tuan Yang Dipertua,

Kementerian Pembangunan Wanita, Keluarga dan Masyarakat (KPWK) melalui Jabatan Kebajikan Masyarakat (JKM) menyediakan bantuan kewangan kepada kumpulan sasar yang memerlukan seperti keluarga miskin, orang kurang upaya, pesakit kronik terlantar, warga emas, kanak-kanak dan mangsa bencana tertakluk kepada syarat kelayakan yang telah ditetapkan.

Setiap permohonan akan disiasat dan diberi pertimbangan berdasarkan **kelayakan dan bukannya hak** tanpa mengira latar belakang kaum, agama atau jantina. Proses pemberian bantuan kebajikan juga mengambil kira potensi yang ada pada setiap penerima bantuan yang masih produktif ke arah hidup berdikari.

Kelulusan pemberian bantuan adalah melalui proses siasatan serta penilaian yang dibuat adalah secara standard dan konsisten. Setiap permohonan lengkap yang diterima akan disiasat dan dibuat penilaian

(means-tested) bagi mengesahkan kelayakan pemohon berdasarkan kriteria am kelayakan permohonan bantuan seperti berikut:

- i) Warganegara Malaysia dan bermastautin di Malaysia;
- ii) Pendapatan keluarga tidak melebihi Pendapatan Garis Kemiskinan (PGK) iaitu RM760 sebulan di Semenanjung Malaysia, RM910 sebulan bagi Sarawak dan RM1,050 sebulan bagi Sabah;
- iii) Tiada mata pencarian tertentu untuk menyara hidup;
- iv) Jika mempunyai keluarga tetapi keluarga tidak berkemampuan untuk menyara hidup; dan
- v) Golongan yang tidak berkemampuan dan berkeperluan berdasarkan kepada hasil siasatan yang dijalankan dengan mengambil kira faktor-faktor seperti tahap kesihatan, keadaan dan kelengkapan rumah dan lain-lain.

JKM tidak meluluskan pemberian bantuan kebajikan berdasarkan pendapatan keluarga semata-mata. Dalam hal ini, JKM turut mengambil kira faktor-faktor lain seperti bilangan ahli isi rumah yang perlu ditanggung, keadaan dan kelengkapan rumah berdasarkan keperluan keluarga, tahap ketidakupayaan ketua keluarga atau ahli keluarganya dan faktor-faktor lain

yang munasabah serta boleh memberikan gambaran kedudukan kewangan dan perbelanjaan keluarga.

Tuan Yang Dipertua,

Bantuan yang telah diluluskan perlu dinilai semula pada **setiap tahun**.

Perkara ini dilakukan bagi meneliti sebarang perubahan status sosioekonomi penerima bantuan dari segi pendapatan dan perbelanjaan bulanan. Langkah ini turut bertujuan untuk mengenal pasti penerima bantuan yang layak untuk berdikari atau diberikan Geran Pelancaran bagi menjana pendapatan untuk keluarga.

Selain itu, proses kajian semula membolehkan JKM membuat semakan status penerima bantuan sama ada masih hidup atau telah meninggal dunia atau berpindah keluar daerah. Oleh itu, JKM dapat menentukan sama ada bantuan kebajikan masih sesuai diteruskan atau tidak bagi tempoh selanjutnya, dan secara tidak langsung mengurangkan ketirisan wang kerajaan.

Tuan Yang Dipertua,

Bagi membantu golongan miskin agar tidak rasa terbeban untuk memperbaharui bantuan bulanan **setiap tahun** terutama bagi kes-kes yang tidak produktif, pegawai kes akan membuat seliaan dengan membuat lawatan ke rumah. Pekerja kes akan membantu klien dalam mengemas kini maklumat bagi menentukan sama ada bantuan masih sesuai diteruskan atau tidak bagi tempoh selanjutnya.

Secara amnya, bantuan kebajikan yang diberikan adalah bersifat sementara. Bantuan ini merupakan satu bentuk saraan hidup bagi membantu kumpulan sasaran yang memerlukan meneruskan kelangsungan hidup dengan sempurna. Dalam pada itu, KPWKM sentiasa meneliti dan mengkaji syarat-syarat kelayakan pemberian bantuan kebajikan agar relevan dan bersesuaian dengan keperluan rakyat.